

Il niev Alfons Tuor da Renzo Caduff

El segn dallas piramidas (2)

DA LEO TUOR

■ **Alfons Tuor ei carschius si en in mund da cudischs. Quei vesan ins sin la fotografia, sche vus seregurdeis forsa aunc da tschella gada dalla meisa, cun quella cozza cun ils mumerlins bunamein tochen plaun, emplenida culs gross volums en disorden saluteivel. Cheu vegneva luvrau e buca sesplenghiau cul cudisch.** Zuar paran ils geniturs dad esser sefatgs si pil fotograf, aber sin meisa ei inscenuu nuot. In tom ei aviarts e viults entuorn e stat cul dies ensi sper in che s'enclina uersch viers in pèr auters, sbargataus sc'in A. En la *Enciclopedia* [cursiv] da Hegel vegn il tgerp dil segn <A> cumparegliaus cun las piramidas. Ellas ein simbol dalla mort e stattan el medem mument per l'entschatta dalla cultura occidentala. Cun A entscheveva il num da G. Anton e quel da sia dunna Antonia e quel da siat da ses affons. Antoni, Alfons, Alois, Alexander Anton, Aurilius, Amalia, Adolf. E cun A entscheivan ils vocabularis cun en ils plaids, quels dings miraculus, ch'ins sto sulettamein metter giu endretg per far tunar lungatg e poesia.

Ei dependa, per esser in grond poet, buca dil diember, contas poesias che ti mettias giu, pertgei poesia ei serenizia, vul dir reduziun al minimum. In pèr paucas lingias san alzar rei el firmament e far rei immortals. Sco quei ei iu cun Muoth: «Dai, spatlunza! – / Tgei speironza / Schai cheu / En quei glin / Manedel fin!», nua che las teilas che vegnan purtadas ella lètg ein las steilas da grond cletg; ni sco quei ei iu cun Tuor (295): «La neiv ei gia stulida. Oz ar' il pur siu èr. / Il crieu gienetschas tillan, in ferm e svelti pèr. / Il bab las crutschas regia, il mat empeil' ils bos, / E dunn' e fèglia cuntschan, tagliont ragischs e cos», nua che l'idilla cala cun Abel che mazzia Cain. Ni sco quei ei iu cun Cadieli: ... Neiv e neiv / Tut la pleiv / Ei da neiv curclada; ni cun Spescha: «Ei neiva ina neiv».

In di, cu nus vegnin a scumbigliar neiv cun pista enneivada, cu nus savein era buca pli tgei che tschiel e steilas ein, perquei che la notg ei contaminada,



La famiglia Tuor durant la lavur d'arar.

sunter che nus vevan daditg emblidau tgei che spatlunza e glin, tgei che crieu e bos fuvan, vegnin nus a ver sco consolaziun la poesia. Ni la fotografia dils «A» culs bos che aran oragiuudem Rabiuis: Empau piars davos el til il bab Anton, donquijotescs magari, cun pipa e fassuir enstagl da scut e lontscha, «plitost in pur latin» sco Muoth manegia e davon el Adolf, Antonia, Aurilius, Amalia ed Antoni sigl èr.

Quei culs plaids e la poesia ei sco culs tuns. Sch'ei tuna bein, stuein nus buca saver la muntada. Igl èr ed il glin che nus savein buca pli tgei ch'igl ei s'udevavan tier nossa cultura e vivan vinavon ella poesia. «Ballontschan buca greuns e glins / E conifs sper nies Rhein?» (190) L'enzenna da damonda ei dublamein significativa: Che grauns, glins e conivs manegian cheu ers matei ch'ils paucs vegnan pli a sentir. Resta aunc a nus pil mument il plaid «neiv», tier il

qual la poesia ha ina speciala relaziun, pervia da siu sun bufatg. En duas poesias dil schar encrescher (140, 178) cumpara tier Tuor sper il patratg «vid il Rhein» era quel «vid las neivs» ed il tschiel. Lu ellas poesias dallas stagiuns ei neiv il bia presenta, da Nadal (227), nua che «steilas claras, biala glina, / rin sil mund, en neiv curclaus». La primavera (204) «la tiara schema» zuar aunc «tut dalla tema / sut la surfatscha / de neiv e glatscha». Mo gleiti cumpara l'emprema flur (203): «Veseis, leu cantscha / la flur il tgau / ord neiv e glatscha, / leu sin quei prau? / ... / Mo neiv cuviera / puspei ils funs, / ed ella miera / a funs, a funs.» Metafra per igl agen destin, ferton che per ils auters arriva il matg (341):

*Juhè, tgei legria,
Terreins ei il vratsch.
La neiv ei stulida,*

*Stulius ei il glatsch.
E veta tut nova
Intreschen la vall.
Tedlei, co murmura
Cun forza gl'ual.*

La neiv semida en ual che «murmura cun forza».

Ella canzun «Il Rhein» eis ei in murmur da «gravedetgna» dil flum che viers la mar, ed il contemplader stat dasperas – sco el era gia staus antruras sila spunda e mirau silla mar – considerond «co ti en paucas – paucas – uras / sespiarder vegnas el sablun» (208). Viu veva il medem Rein sco giuvenaster «sper neiv e glatscha / la steil'alpina dulutsch florir».

La steil'alpina ei la steilalva, el mender cass igl Alvnibel. Ella ei buca da scumbigliar cun la flur alpina (58), la striauna, che ei tier Muoth la ros'alpina, che ei puspei tier Tuor la rosa (91)

che Goethe numna Heidenröslein. Aschi cumplicau ei quei cun flurs e poets. La «ros'alpina» da Muoth ei il medem puccau sco igl «alvnibel» da Camathias. Mo ch'in talent sa far puccaus, e la poesia lava naven els: «Schia va cun Clau Camengia / Segner Pieder de Pultengia / ... / Per la plaunca lavinera, / Sur la neiv e sur gallera, / Denter matgs de ros'alpina, / Denter trusclia, sur burschina / E svanescha sulla siala / Sils pastgets de muntaniala.»

En vers che stattan a pèr cun Muoth cumpara la neiv sco plaga egiziana el tgau dil semnader (160). Lingias che mintga scolar saveva recitar inagada sco siu bab il Horaz: «Vid neivs e saléps e purgin' e garniala, / El forsa pertratga cun tem' e sgarschur; / Tenent entameun la tremblonta capiala / El ditg recomonda siu èr al Signur.»

Aschia fussen nus puspei arrivai, nua che nus vevan entschiet: tier igl èr.

Ve vevel jeu giu il plan da paterlar dalla «crotscha exponida» e da ruschnar da sias restonzas, da raquintar plinavon privat da siu «tschutt de mei». Level lu demonstrar daco ch'ins stuess far il discurs dils «tirans de Cartatscha» el plural, per lu decantar las balladas pauc enconuschantas dil malizius «Noà». Vulevel en in excuors, far attents alla sort tragica dalla translatura dad A. T., Anna Theobald, taxada dils assistents (ruhige Geistesranke) e nudada dils innocents (Amazonenstatur – in Mannskleidern). Vevel finalmeins quintau ver endamen dils «Magnificats» che Alfons teneva aschi ault, che negin ha cumprau e ch'il bab ha manegiau: «Tes magnificats, che Ti has eung partut sterniu ora, pos e sas Ti metter ensemen et alla finala dar fuig...».

Igl ei vegniu auter. Aschia tucca ei a ti, carA lecturA, da far per tei el cudisch las trovaglias, retenidas per mei.

Alfons Tuor ei staus bia da sia veta malsanetsch. Tonaton ha sia malsogna buca surpriu siu curtin, sia plema denton adina puspei nus:

«De tuttas malsognas, / Ch'ils carsteungs han, / Ei ina la mendra: / Il Grössenwahn!»

Alfons Tuor: Poesias. Ovra lirica completa edita da Renzo Caduff, Cuera 2015.

150 ONNS CLAUSTRA DA GLION

Avischinaziun agl uorden dominican

(anr/gc) **Tgei coincidenza! Cun la fin digl onn ecclesiastic 2015 – dumengia da Cristus Retg, ils 22 da november – ei il giubileum da 150 onns claustra da Glion vegnius concludius.** Quel ha gest fatg la punt viers l'entschatta dil giubileum «800 onns uorden dominican 2016». A quel ei la Societad dalla carezia divina a Glion s'affiliada alla fin dil 19. tschentaner. Quei pass ei vegnius preparaus da rudien e ponderaus bein. Mo l'affiliaziun ha duvrau siu temps.

Emprens contacts culs dominicans

Gia dil temps dalla confundatura ed emprema superiura generala, Maria Theresia Gasteyer, vevan ins giu contact cugl uorden da s. Dumeni. La raschun principala persunter era da survegnir in spiritual stabel per la claustra.

E puspei inaga eisi stau cuss. naz. Caspar Decurtins, da Trun, che ha mess fil en guila. Sin siu giavisch duevan las soras da Glion surprendre il percaso el convict Albertinum a Friburg. Leu habitavan dominicans, ch'eran professers alla facultad teologica dalla gest fundada Universitad da Friburg 1889. Mo in onn pli tard ein las soras da Glion serendidas en quei marcau universitar.



La secunda superiura generala, sora Wilhelmina Gasteyer, e pader spiritual Reginald Krempff.



FOTOS MAD

A Friburg duevan ellas emprender d'enconuscher igl uorden dominican. Caspar Decurtins ha plinavon contactau – sur il dominican, pader Berthier, siu amitg, – il magister general digl uorden dils dominicans a Ruma Andreas Frühwirth. Quel ha demussau nunspe-

tgadamein gronda capientscha e beinvulentscha viers la claustra da Glion. Ton la sora superiura sco era igl uestg da Cuera ein stai cuntents da quella viulta cun era survegnir in spiritual stabel.

Il matg 1892 ei pader Reginald Krempff, in dominican, arrivaus da Lu-

xemburg sco spiritual ella claustra a Glion. El era oriunds dalla Lorena (Lothringen) e dueva ver gronda influenza sil svilup dalla Societad dalla carezia divina a Glion en direziun uorden dominican. Mo el leva denton reformar la cuminonza da Glion. Siu ideal fuva da basar quella sin in uorden contemplativ. Pader Reginald Krempff, il spiritual dalla claustra, ha capiu bein d'avischinar la congregaziun tras la liturgia, teologia e historia agl uorden da s. Dumeni.

Sora Wilhelmina Gasteyer – secunda superiura generala

Ils 8 da fenadur 1892 ha il capetel eligiu sora Wilhelmina Gasteyer sco nova superiura. Ella fuva successura e sora dalla confundatura, sora Maria Theresia Gasteyer, e bunamein 20 onns pli giuvena che lezza. La nova superiura era arrivada 1874 cun 20 onns a Glion. Ella era gia scolasta, mo ha aunc fatg supplementarmein la patenta al seminari scolaristic a Cuera.

Cuort suenter ver fatg il profess ei sora Wilhelmina Gasteyer daventada 1876 assistenta dalla cuminonza. Ella ha menau ils pensunats a Cuera ed a

Glion, ei stada superiura dallas pli impurtontas filialas e daventada magistra dallas novizas. Ella fuva pia sepreparada fetg bein per igl uffeci da superiura generala ed ei vegnida eligida treis gadas en quei uffeci (1892–1898 e da 1904 tochen 1910), igl onn da sia mort. Ella eri migeivla, plein capientscha ed hagi capiu oreifer d'equilibrar ed intermediar. Sut sia egida ha la claustra da Glion giu ina epoca benedida.

Gia tier l'elecziun dalla sora superiura Wilhelmina Gasteyer 1892 ha igl uestg da Cuera giu il giavisch che la Cumminonza monastica da Glion sedrezzi tier la revisiun dalla constituziun existenta viers quella d'in vegl e secumprovau uorden. La congregaziun a Glion ha acceptau quei cussegl, e consultau ed examinau las constituziuns da divers uordens. Ins hagi era tratg en consideraziun la constituziun dallas oblatas da s. Benedetg, buc il davos ord engrazieivladad viers la claustra benedictina da Mustèr ch'era adina puspei segidada. Lu ein ins secussegliaus cul spiritual, pader Reginald Krempff, che ha secapescha era rendiu attents alla constituziun da siu uorden dominican. Ed ins ei lu sedecidius dad in tier quel.